

दिनांक 02.10.2024

समय: 18.45 बजे

आकाशवाणी जयपुर-अजमेर

- प्रधानमंत्री नरेन्द्र मोदी लोगों सूँ स्वच्छता ने जीवन मांय अपणाने री अरज करी-9 हजार 600 करोड़ रुपया सूँ बत्ती री न्यारी-न्यारी स्वच्छता परियोजनावां रो उद्घाटन कर्यो।
 - राष्ट्रपिता महात्मा गांधी अर पेली आळा प्रधानमंत्री लाल बहादुर शास्त्री री जयंती माथे वांने श्रद्धापूर्वक याद करीज्यो-“स्वच्छता ही सेवा” पखवाड़े रो आज व्हयो समापन।
 - मुख्यमंत्री भजन लाल शर्मा प्रदेश रा 20 हजार 721 चुण्योडा विमुक्त, घुमंतू अर अर्द्ध घुमंतू पिरवारं ने आवासीय पट्टा बांट्या।
- अर
- नौ दिनां ताई चालण वाळो उपासना रो परब शारदीय नवरात्रा री सरुआत काले सूँ।

000

प्रधानमंत्री नरेन्द्र मोदी कह्यो है के स्वच्छता री प्रतिबद्धता जीवनभर री प्रतिज्ञा है। वणा लोगों सूँ अरज करी कि वे स्वच्छता ने जीवन रो खास हिस्सा बणाने रो प्रण लेवे। स्वच्छ भारत मिशन रा 10 बरस पूरा होणे रे मौके माथे आज नुवी दिल्ली मांय स्वच्छता ही सेवा कार्यक्रम मांय बोलता थकां श्री मोदी स्वच्छता ने जन आंदोलन बणाणे खातिर 140 करोड़ भारतीयां री अटूट भावना ने नमन कर्यो। प्रधानमंत्री कह्यो के सेवा पखवाड़े रे केवल 15 दिनां मांय देश मांय 27 लाख सूँ बत्ती कार्यक्रम राख्या गया, जिण मांय 28 करोड़ सूँ बत्ती लोगों भाग लियो। वणां कह्यो के ओ दिन आपा ने महात्मा गांधी अर देश री दूजी महान हस्तियां रे सुपणे रे भारत ने सच्चाई मांय बदलने खातिर प्रेरित करे है।

.....

प्रधानमंत्री स्वच्छता सूँ जुडी 9 हजार 6 सौ करोड़ रुपया सूँ बत्ती री न्यारी-न्यारी परियोजनावां री सरुआत करी। आं परियोजनावां मांय अमृत अर अमृत-टू, स्वच्छ गंगा खातिर राष्ट्रीय मिशन अर गोबरधन योजना रे तैत 15 संपीड़ित बायोगैस संयंत्र परियोजनावां भेली हैं।

इण कार्यक्रम सूँ मुख्यमंत्री भजन लाल शर्मा भी जयपुर सूँ वीसी रे माध्यम सूँ जुड्या। इण रे चालता मुख्यमंत्री कह्यो के देश रा यशस्वी प्रधानमंत्री नरेन्द्र मोदी रा अथक प्रयासा सूँ स्वच्छता अबे जनसेवा अर जन आंदोलन बण चुकी है अर स्वच्छ भारत री बुनियाद माथे बढ़ता व्ह्या विकसित भारत-विकसित राजस्थान रो विजन साकार कर्यो जा रह्यो है। ध्यानजोग है के आज व्ह्या लोकार्पण कामा मांय अमृत योजना रे तैत राजस्थान रा चूरू अर अजमेर मांय सीवरेज ट्रीटमेंट प्लांट बणाया गया है।

000

राष्ट्रपिता महात्मा गांधी अर पेली आळा प्रधानमंत्री लाल बहादुर शास्त्री री जयंती माथे आज वांने सिरधापूर्वक याद कर्यो जा रह्यो है। इण मौके माथे परदेशभर मांय सर्वधर्म प्रार्थना सभावां राखीजी। राज्यपाल हरिभाऊ किसनराव बागड़े अर मुख्यमंत्री भजनलाल शर्मा जयपुर मांय जवाहर लाल नेहरू मार्ग स्थित गांधी सर्किल माथे राष्ट्रपिता महात्मा गांधी री मूर्ति माथे पुष्प अर्पित कर र वांने सिरधाजंलि दी। इण सूँ पेल्या राज्यपाल राजभवन मांय महात्मा गांधी अर शास्त्री जी ने माळा चढा र सिरधाजंलि दी।

मुख्यमंत्री शासन सचिवालय मांय महात्मा गांधी अर लाल बहादुर शास्त्री री जयंती माथे पुष्प अर्पित कर र वांने सिरधाजलि दी। पैल्या आळा मुख्यमंत्री अशोक गहलोत राष्ट्रपिता महात्मा गांधी अर पूर्व प्रधानमंत्री लाल बहादुर शास्त्री ने नमन करता व्हा वांने सिरधाजलि दी। गांधी जयंती रे मौके माथे आज सूं जयपुर रा सेन्ट्रल पार्क मांय थापित गांधी दर्शन म्युजियम री सरुआत व्हे ग्यी। पर्यटन कला अर संस्कृति महकमा रा शासन सचिव रवि जैन बतायो के पेले दिन आज एक हजार सूं बत्ती पढेसरी गांधी वाटिका न देख्यो अर वाणी जीवन यात्रा ने जाण्यो। वणां कह्यो के गांधी वाटिका जयपुर मांय एक नुवे पर्यटन केन्द्र रे रूप मांय उभरेली। झुन्झुनू मांय गांधी पार्क मांय जिला प्रशासन, स्काउट गाइड अर न्यारा-न्यारा संस्थानां री कानी सूं सर्वधर्म प्रार्थना सभा राखीजी। वठीने डीग मांय गांधी जयंती अर शास्त्री जी रे जन्म दिन रे मौके माथे किशन लाल जोशी राजकीय उच्च माध्यमिक विद्यालय मांय श्रद्धाजलि सभा राखीजी। वठीने बापू रा जीवन सूं जुड्या प्रसंगा न लेर प्रश्नोत्तरी कार्यक्रम भी राख्या गया।

ब्यावर मांय चांग गेट थापित बापू री मूर्ति माथे जिला प्रशासन सूं जुड्या अहलकार, जनप्रतिनिधि अर आमजन पुष्पाजलि अर्पित करी अर इण मौके माथे मौजूद लोग ब्यावर ने साफ बणायो राखण रो संकल्प लियो। टोंक जिला मांय भी न्यारी-न्यारी जगावां माथे प्रार्थना सभा अर सिरधाजलि सभावां रो आयोजन व्ह्यो। शाहपुरा मांय गांधी जयंती स्वच्छ भारत दिवस रे रूप मांय मनायी ज्यी। बाड़मेर मांय अहिंसा चौराहा माथे जिला स्तरीय कार्यक्रम मांय प्रार्थना सभा रे आयोजन रे पाछे मौजूद लोग महात्मा गांधी अर लाल बहादुर शास्त्री ने सिरधासुमन अर्पित कर्या।

000

स्वच्छता ही सेवा पखवाडो आज सम्पन्न व्ह्यो। राज्य स्तरीय समापन जळसो जयपुर रे इंदिरा गांधी पंचायतीराज संस्थान मांय राख्यो गयो। इण मौके माथे नगरीय विकास मंत्री झाबर सिंह खर्रा पखवाडे रे चालता श्रेष्ठ प्रदर्शन करण वाळा नगर निकायां ने सम्मानित कर्यो। इण मांय जयपुर ग्रेटर नगर निगम पेली जगा माथे रह्यो। अजमेर नगर निगम दूजे अर जोधपुर दक्षिण नगर निगम तिजो स्थान हासिल कर्यो।

नगर परिषद री श्रेणी मांय चित्तौड़गढ़ पेले अर जैसलमेर दूजे पायदान माथे रह्यो। जळसे मांय जयपुर स्वच्छता फिल्म भी रिलीज करीजी। फिल्म मांय शहर री स्वच्छता यात्रा ने दशार्थी गयो है। इण रे साथे ही व्यापारिया, आमजन अर स्वच्छता योद्धावां रे संदेशां रे माध्यम सूं साफ-सफाई रे महतव ने बतायो गयो है। डूंगरपुर मांय स्वच्छता पखवाडा रे समापन रे मौके माथे चौखा काम करण वाळा 45 सफाई कर्मियों ने सम्मानित कर्यो गयो। वठीने स्वच्छता ही सेवा अभियान रे समापन माथे जिले रा आसपुर मांय रक्तदान शिविर राखी ज्यो।

000

देश मांय इलेक्ट्रिक वाहनां खातिर कर्या गया पंजीकरणां री संख्या सितम्बर मांय एक लाख 59 हजार यूनिट ताई पहुंच ग्यी। आ लारले बरस री इणी अवधि री तुलना मांय एक लाख 29 हजार यूनिट बत्ती है। इलेक्ट्रिक वाहनां रे पंजीकरण री संख्या मांय साल दर साल 23 फीसदी री खास बढोतरी देखीजी है। मौजूदा वित्त बरस री पहली छमाही मांय इलेक्ट्रिक वाहनां री संख्या मांय लारले बरस री इणी अवधि री तुलना मांय 20 फीसदी री बढोतरी व्ही है।

सगळी श्रेण्यां मांय कुल पंजीकरणां री संख्या बध र आठ लाख 93 हजार यूनिट व्हे ग्यी, जदकि लारले बरस इण बकत आ सात लाख 45 हजार यूनिट ही। इण बीच सरकार काले दो बरस री अवधि खातिर दस हजार नौ सौ करोड़ रुपया री लगत सूं पीएम ई-ड्राइव योजना री सरुआत करी। प्रधानमंत्री नरेन्द्र मोदी री अध्यक्षता मांय केंद्रीय मंत्रिमंडल 11 सितम्बर ने इण योजना रो अनुमोदन कर्यो है। पीएम ई-ड्राइव योजना देशभर मांय इलेक्ट्रिक वाहन अपनाणे मांय तेजी लाणे अर चार्जिंग रे खास बुनियादी ढांचे ने बणावण मांय महतव भूमिका निभावेली, जकि स्वच्छ अर बत्ती टिकाउ भविष्य मांय योगदान देवेला।

000

मुख्यमंत्री भजनलाल शर्मा आज जयपुर मांय राखीज्या राज्य स्तरीय जळसा मांय विमुक्त, घुमंतू अर अर्द्ध घुमंतू परिवारां ने आवासीय पट्टा सोंप्या। दुर्गापुरा थापित कृषि अनुसंधान संस्थान मांय राखीज्या कार्यक्रम रे पेले चरण मांय 20 हजार 721 चुण्योडा परिवारां ने पट्टा दिया गया। इण रे चालता जिला स्तर माथे भी पट्टा वितरण कार्यक्रम राख्या गया।

राज्य स्तरीय जळसे रो सगळा जिला मांय होवण वाळा कार्यक्रम मांय सजीव प्रसारण कर्यो गयो। मुख्यमंत्री चुण्योडा 10 जिलां रे लाभार्थियां सूं वीडियो कॉन्फ्रेंसिंग रे जरिये संवाद भी कर्यो। टोंक जिले री उनियारा पंचायत समिति मांय उर्जा मंत्री हीरा लाल नागर लाभार्थियां ने आवासीय पट्टा बाटया। वठीने करौली मांय घुमंतू, गाडिया लुहार अर दूजा विमुक्त समाज रा लोगां ने पट्टा दिया गया। शाहपुरा जिला मुख्यालय माथे राखीज्या कार्यक्रम रे चालता जिला कलेक्टर राजेन्द्र सिंह शेखावत जिले रा 482 भूखण्डहीन परिवारां ने पट्टा बांटया। सवाईमाधोपुर, झालावाड अर कोटा मांय भी विमुक्त, घुमंतू अर अर्द्धघुमंतू परिवारां ने आवासीय पट्टा बांटया गया। बारां जिला मांय 690, जैसलमेर मांय 260, केकड़ी मांय 120 सूं बत्ती पट्टा बांटया गया। वठीने सिरौही मांय जिला स्तरीय कार्यक्रम मांय 1400 सूं बत्ती लाभार्थियां ने आवासीय पट्टा दिया गया।

000

नौ दिन ताई चालण वाळा उपासना रे पर्व शारदीय नवरात्र री सरूआत काले सूं व्हेला। नवरात्रा थापना न ले र राज्यपाल हरिभाऊ बागडे अर मुख्यमंत्री भजनलाल शर्मा प्रदेशवासियां ने शुभकामनावां दी है। नवरात्रा परव न लेर प्रदेश रा न्यारा-न्यारा जिला मांय तैयारियां जोरा माथे है। पाली मांय दुर्गा माता री माटी री मूर्तियां बणावण खातिर आमजण मांय खासो उच्छास है। साथे ही 150 सूं बत्ती जगावां माथे मंदिरां अर गरबा पंडालां ने फूलां अर सोवणी लाईटां सूं खास सजायो जा रह्यो है।

000

कोटा रो प्रसिद्ध राष्ट्रीय दशहरो मेळो काल सूं सरू व्हेला। 28 अक्टूबर ताई चालण वाळा इण मेळे मांय न्यारी-न्यारी सांस्कृतिक प्रस्तुतियां दी जावेला। इण मेळे ने देखण खातिर देश री न्यारी-न्यारी जगावां सूं घणी तादाद मांय लोग आवे है।

000

झुंझुनूं जिलेवासियां ने आज माता वैष्णों देवी जावण खातिर स्पेशल ट्रेन री सौगात मिली है। पहली बार स्पेशल ट्रेन रे झुंझुनूं पहुंचणे पर लोगां मांय घणो उच्छास नजर आयो। इण मौके माथे लोगां लोको पायलट ने माळा पहना र स्वागत कर्यो। इण ट्रेन रे संचालन सूं झुंझुनूं सूं माता वैष्णों देवी जावण वाळा श्रद्धालुआं री राह आसान व्हेला। गौरतलब है कि उदयपुर सूं माता वैष्णों देवी कटरा खातिर आज सूं 13 नवम्बर ताई स्पेशल ट्रेन रो संचालन झुंझुनूं होता व्हा कर्यो गयो है।

000